

Interes grandi entre artista y operadornan di tour pa desaroyo cultural na San Nicolas



ORANJESTAD (AAN): Diasabra mainta despues cu Minister Otmar Oduber a reuni cu artista y operadornan di tour relaciona cu e desaroyo di San Nicolas den e Capital di nos Herencia Cultural, a conversa cu Bertie Kelkboom, doño di Banana Bus y operador di tour.

El a indica cu e presentacion tabata uno hopi interesante y ta spera cu e ta algo cu wordo realiza, e ta haye hopi interesante mirando cu e ta un persona cu ta haci tours y na e momentonan aki tur su tournan ta concentra na Playa y area di hotelnan, unda tin actividadnan.

Scuchando tur loke a wordo presenta, Bertie Kelkboom a bias cu sigur e lo tin potencial pa yega San Nicolas.

E ta bias tambe cu tin hopi turista crucero cu a yega di bin Aruba hopi biaha caba y tur loke tin na Playa nan a wak caba y cu e desaroyo di San Nicolas, lo por bendenan un producto nobo caminda lo por haci un shopping hopi interesante, no solamente t-shirts y serbete, pero algo cu a wordo traha y produci na Aruba mes. Es decir, esaki lo ta algo hopi interesante pa un grupo grandi di turista cu ta bin Aruba.

Tambe a probecha e ocasion pa papia cu un di e artistanan presente, Irene Peterson cu ta pintora y ta haci diferente sorto di arte, mientras cu su profesion ta diseñadora grafico.

El a indica cu e vision di Ministerio di Cultura pa haci di San Nicolas e capital cultural di Aruba ta uno hopi bon, cu e ta un direccion positive y e ta sostene mas ainda mirando cu e ta di San Nicolas.

Sra. Peterson ta bisa cu San Nicolas ta un lugar hopi interesante, mas diverso y e ta parti di Aruba. E ta spera cu e desaroyo cultural lo ta un incentivo pa otro desaroyonan y ta dispuesto pa duna su contribucion na esaki.

